

Pedrõ ha dukũ hatu kene bumanikiaki

1 PEDRO

Pedrõ hatukiri xinãnikiaki, na hãtxarã

1 ¹ Ë Pedro Jesus Cristõ kuxipayatũ ã hãtxa ã matu bumaii, mã mai pakea tibi Ponto inũ, Galácia inũ, Capadócia inũ, Ásia inũ, Bitínia anu mã hiwebaunabu anurã. ² Epa Deusũ tsuabura katukatsis ikĩ bebũkiri haska xinaĩ keska mã ishanũbũ hawẽ Yushĩ Pepawẽ matu pewanishũ ma matu meribi waniki. Haskawẽ taeshũ mã txibãkubaĩshanũbũ hawẽ himiwẽ Epa Deus daewakĩ Jesus Cristõ matũ txakabu buaniki. Hawẽ taeshũ Epa Deusũ hawẽ pepa itxapa yauxiama matu inãkĩ hau matu unãnuma hiwemakubainũwẽ.

Ikũwaĩbu Deusũ hatu kẽwãkĩ duawashanikiaki, na hãtxarã

³ Nũ hawẽ bakebus pepawẽ nuku kupia nũ habe hiweshanũbũ nukũ Shanẽ Ibu Jesus Cristo nukuwẽ nuihairaya Deusũ ana bestẽwãkĩ nuku bake kaĩ bena keskati waniki, ha xinãkĩ hiwea ikibi ika betsa ha manakai hiweti nuku inãkinã. Haskawẽ taeshũ nukũ Shanẽ Ibu Jesus Cristõ mekenika Deus, hawẽ Eparã, kẽwãriakubainãkãwẽ. ⁴ Nai anu hawa yamatiruma inũ, mexu tsamitiruma inũ, hawa txapui niri itiruma Deus matuki tanatã hawara pepa aruni Jesus Cristõ hawẽ manakukĩ matu inãkeakeshanikiki, mã hawẽ hiweshanũbunã. ⁵ Matũ xinãwẽ mã Deusũ kakape ikũwãkubainaiwẽ taea Deusũ hawẽ kuxipa paewẽ matu mekekubaĩkĩ haska yubakani hanu bari hawẽ heneaitiã haska matu pewashuni mã unãkubaĩmis ibubis hanu haki nukukĩ mã uĩshãkanaii.

⁶ Haskawẽ taea natiã bika betsa betsapa hawẽ matu unãti waibuwẽ haskawẽ benimatimabiakẽ mã hawẽ benimayutirubuki. ⁷ Hanua shanẽ ibuhairai Jesus Cristo ana hushũ matuwẽ benimakĩ hau matu kẽwãshanũ haska ouro mane taxipa txiwẽ pewakĩ has wamisbu keska wakĩ: “Haska

mã Jesus ikūwaĩburi pewakĩ matũ xinã mã ma mestẽ matu uĩnũ”, ishũ habũ matu itxakawaibu Deusũ hawẽ matu unãti waikiki. Haska ouro mane taxipa bikatsi imisbu keskakĩ Jesus ikũhairawai txĩtuãma pepakĩ mã hatu binuaiĩ.

⁸Haska inũ, Jesus Cristo uĩyama ibiani mã abuhairaii. Ha inũ, natiã uĩyama ibiani mã ikũhairawariai. Haska benima pae mã haya hãtxawẽ besti ha benima pae tsuã haska tashnimatirumaki. ⁹Haska Jesus Cristo xinãkĩ mã ikũwai Deusũ kupitiwẽ yurabu kupiaya matũ binui mã pashashanai mã hari xinaiĩ.

¹⁰⁻¹¹Haska wakĩ Deusũ matu duawakĩ yunushanaikiri hawẽ hãtxa yuishunikabũ Messiasikiri bebũkiri itxakawabu nuitapatã hatu maemashanaikiri Cristõ Yushĩnĩ hatu unãmaya Deusũ hatu kenema habũ ibubis tapĩnũ ishũ benahairakĩ xinaĩ: “Tsuamẽ? Hatiã haskashanimẽkai?” ikubainĩbukiaki. ¹²Ha Messiasikiri hatu txanimakĩ hau Deusũ hãtxa yuishunikabũ ibubis Deusũ yusĩa nĩkatã hakiri hatuna besti watirubuma Deusũ habu txipu hiweshanaiburi hau habũri hakiri unãshanũbũ, iwanã, habu matu kenemashuniki, matu merabewakinã. Messias Cristokiri kakape matu unãmakatsi ikĩ hawẽ Yushĩ Pepa naiuria yunua hanushũ Jesuskiri yusĩnã betsabũ hakiri datã akĩ matu unãmakubaunibuki. Na habias kakape matu yusĩaĩbu Deusũ nai tsumabũri ana tapĩpai iriakanikiki. ¹³Jesus Cristo mã ikũwaiwẽ taea ana tatimama dasibi matũ xinã mestẽwãtã haskaki txiti itã dateyamakubaĩkãwẽ. Jesus Cristo ana hushanai manakakĩ Deusũ hawẽ pepawẽ matu duawashanai ikũwakĩ haskakiri besti manayukubaĩkãwẽ.

**Deusũ ha hiwea keska na mai anu nũ meribi pepai
hiweshũyunũbũ nuku katunikiaki, na hãtxarã**

¹⁴Uatiã Deus unãriama txakabu abui mã txakabupaunibuki. Haskakẽ natiã Deusũ bakebui ana haska mã abupauni keska hiweama bake mixtĩbũ hatũ ibuã hãtxa nĩkatã txibãmisbu keska hiwekubaĩkãwẽ.

¹⁵Natiã ana haskama matũ hiwea betsa watã meribi pepakubaĩkĩ bika tenekĩ hatu uĩmakubaĩkãwẽ, hatũ matu katuni meribi pepa hiwea keskariarã. ¹⁶Deusũ Moisés yuikĩ: “Ë meribi pepawẽ taea maturi meribiri pepakubaini hiwekubaĩkãwẽ”, ikai nĩkatã keneniki.

¹⁷Habiaskari wakĩ yurabu betsa betsapa dasibi uĩkĩ hatũ xinã tibi inũ haska wamisbu tibi kaneama Deusũ unãti washanaiwẽ taeshũ Deus dayuikĩ: “Epaã, ea mekewe”, aki bari tibi matũ hiweawẽ duawakĩ kẽwai haki mesekubaĩkãwẽ. ¹⁸Hamẽ matu ikirã, matũ shenipabũ Deus unãma txakabu besti akĩ hatũ matu merabewakĩ hiwemakĩ pewatiruma beyawanibu mã hatu txibãkĩ akubainirã, mã unãhairaii. Tsuã haska matu meketirumahairabiakẽ hawẽ matu kaĩmakinã, hawara mabu txapumis ouro inũ prata mane keskawẽ matu akama ¹⁹hamẽ haskama txashuwã

bake pepa hawa txami hayama deteshū menu keyukī Deus daewapaunibu keska wakī hawē bake Cristo mawakī hawē himi pepahaira dasibi betsana binuawē Deus hawena nuku wati wamakī hawē daewati waniki. ²⁰Ha inū, nai inū mai damiwakī taewariama Messias Cristo yununūbarikatsi Deus bebūkiri yubakanikē hanu ma bari hawē heneaitiā ma kemaya matu merabewanū ika Jesus tashninikiaki. ²¹Haskakirā Cristō hawē Epā hātxa matu unāmaiwē taeshū mā Deus ikūwānibuki. Haska matu wabiaya tenābu Deusū ana bestēwākī Shanē Ibu wani na habiatīā matū xināwē hakiri ikūwākī Deusū hiwekuīa matu ināshanai mā haki txiti ishū manakakubainai.

²²Mā ma haskawē taea natianā, Deusū kakape Jesuskiri nīkatā ha hātxa txanima txibaī mā ma meribi pepabuki. Haskakubaikinā, ikūwaī betsabube abuname kayabikubaikāwē. Haskakī matū huīti hawa txakabu hayama inū matū kuxipa hirabiwē betsabu merabewai hatuwē nui abunamei hatube duanamepakekāwē. ²³Mā haskakūkaishanū Deusū ana matu kaī bena keska waniki, matū ibubu txutanamekī matu bawani keskama hakia Deusū hātxa hiwea betsaisma haya mā ikūwākī xinā betsa waiwē taeshunā, nukunabube danānanāma mā abunamekubainūbunā. ²⁴Haska Deusū hātxa betsa waismakiri hawē hātxa keneshunika Isafasī yuikī:

“Yura dasibi ni mashu keskabuki.

Ha inū, hawē hawēruai hawē pepamisburā,
ni mashu hawē hua keskabuki.

Bari betsatiā ni mashu txuxiaya hawē huari utsitā niri imiski.

²⁵Hakia Yavé Deusū hātcharā,
betsai keyuisma ipakeai hayaki”,

aniki. Na habias hātxa Jesuskiri kakape hakiri datā aki hawē yuinika betsabu matuki txanirianibuki.

Jesuswē taeshū Deusū hawenabu bena wanikiaki, na hātcharā

2 ¹Haska inū, hamapai txakabu tibi mā akeakemis inū, mā parananāmis inū, mā beparamemis inū, tsuara hawara pepa hayakē mā haskatiruma xinaī mā hatuki sinatamis inū, hawara yura betsa ikai uītā matunamabia hawē taea mā yuānanākeakemis ana haskakiri xināma henerikubaikāwē. ²Bakeixta kaī taea txutxu beya wamakī amabu hawē yumeti unāmis keskakī nukū Shanē Ibu Jesusū yusīa kayati wakī hawē huīti kuxipanū ishū hawē hiwekuī pashati hātxa tapī mestēkubaikāwē, ³nukū Shanē Ibu Jesusū matu mekemis hawē pepa unākī mā ma unāti wawē taearā.

⁴Jesus hiwe mestēwāti mixki keska hunibū danābianibū Deusū abuhairakī katuni bestibu tibi ha mixki hiwea pepa haibu wai haki ketashamekubaikāwē. ⁵Mā haskakūkainaya mā Jesus ikūwaību dasibi

mixki hiwe keska wakī hawē kēwāti kayabi matu wakubainikiki, haskai duanamei mā ma haki dasiaburā. Matu dasibi mā Deusbe hātxashunikaburā, mā hawenabu meribiki. Jesus Cristo mā ikūwaībuwē taeshū haska Deusū abuai akī mā Deus benimawakubainaii. ⁶Haskai kaikiri hawē yuishunika Isafas Deusū yuikī:

“Uīa. Katushū hawē hiwe mestēwāti mixki pepa keska shanē ibu kuxipa Jerusalēm anu ē tashnimashanaii.

Hawē hātxa habū ha ikūwaību eā ē hatu dakewama ishanaii”, aka nīkatā keneniki. ⁷Na haska keneni keska tsuabūra ma ha mixki kuxipa ikūwaību maturā, mā ha abuhairaii. Hamē tsuabūra ha mixki kuxipa ha ikūwāma danākubaīkanikiki, ha keneni keska wakinā:

“Mixki hiwe wanikabū ha mixki danābiaibū hawē hiwe mestēwāti kayabi mixki pehairaki, kuxiparā”, aniki. ⁸Ha dikabi Deusū na eskakiri Isafas yuikī:

“Haki huti itā tī iti mixkiki, hawē hatu sinatamatirā”, ani keskariai tsuabūra ha hātxa hakiri kakape nīkatā txibākatsi ikama danaī haki huti itā haki sinatai keskabu Deusū habu kupishanikiki.

⁹Hanua maturā, yura shuku betsa matu katuniki. Ha inū, shanē ibu binua Deusbe hātxashunikabu matu dasibi wakī ikūwaību meribi shukua betsa matu wakī Deusū ibu wakī abukī hawenabu matu warianiki. Haskawē taeshū hakiri hawē daya pehaira Deuskiri mā txanikubaūshanūbū mā mexu merā ika keskashū txakabu wamisbu hanua matu kenakī Cristō shaba hawērua anu matu hikimakī hiwemakatsi matu tashnimaniki. ¹⁰Ha inū, ha dukū Deusunama mā inibukī. Hakia natiā mā ma Deusū enabuki. Ha dukū Deus matuwē nuiama ibiani na habiatīa matuwē Deus nuikiki.

Deus kēwai pepakī hatu uīmatikiaki, na hātxarā

¹¹Ē betsabū inū ē puibuū, ē matuwē nuikī yunuai ea nīkakāwē. Mā txaikea huima mā ikūwābumabe hiwea naxui ika keskaburā, ha yurabū haska xinaī habū kemu paewē matū yushī atxishū yabutā matu bika tenematirurā, haska abuama henekubaīkāwē. ¹²Hakia ikūwābumabe mā hiwearā, Deus kēwai hatu naxui ika hiweshū pepakī hatu uīmakubaīkāwē. Mā haskaiwē taea mā yura txakabu ikai dabanē xinākī matu yuābiamishū matū pepa uīkī habūri Jesus Cristo ikūwākī Deus kēwātirubuki, Deusū hanu yurabu unāti wakī keyushanaitianā.

Shanē ibu tibi nīkatikiaki, na hātxarā

¹³Nukū Shanē Ibuwē taea na mai anu matū shanē ibubu hatu nīkakī txibākubaīkāwē, ha dukū hatū mai pakea shanē ibu betsa binuatū yunu keyua ¹⁴inū habu shanē ibu beshmasbu shanē ibuhairatū hatu yunua txakabu waibu hatū yununikabu hatu kupimamis inū pepa akaibu hatū

pewẽ kẽwãmisburã. ¹⁵Eska Deusũ matukiri abukĩ xinaĩkiki. Mã pe bestĩ wai hatu uĩmakubaĩkãwẽ, habũ matu yuaĩbu inũ hãtxa unãmabia unaĩmapai matukiri sinatai hãtxa txakabumisbu hau beshtekei ana matukiri hãtxayamanũbunã.

¹⁶Ha inũ, Deusũ kupiti Jesusũ txanima ma matu binumaniki. Haskawẽ taeshũ: “Ë ma kupiti hayamaki”, itã matũmebi ana txakabu unãti wamanũ ika ana haska xinãyamakubaĩkãwẽ, ana Deusũ kupitiki dateama hawẽ tsumabu pepa bestĩ ikubainirã. ¹⁷Dasibibũ matu yunumisbu hatu nĩkakĩ uĩmakubaĩkãwẽ, matubetã ikũwaĩbube nuinamei inũ Deusũ kuxipaki mesekĩ hawẽ hãtxa txibaĩ inũ Romano shanẽ ibu binuatũ hawẽ hãtxa nĩkatã txibãriakinã.

Jesus yumani keskariatikiaki, na hãtxarã

¹⁸Hamẽ habũ mã hatu dayashũmisbuũ, haska matũ shanẽ ibũ yunuai danãma nĩkatã ashũkubaĩkãwẽ, matũ shanẽ ibu duapa inũ matũ shanẽ ibu duapamari ashũkĩ uĩmakinã. ¹⁹Mã Jesus ikũwainã, txanima ha dukũ matũ hiwearã, Jesusunaki. Mã hawa txakabu wamabiakẽ matũ tsumapã matu bika betsa betsapa memabiaibũ hawa yuiama tenetã haska Deusũ abuai ashuĩ haskai mestetã hiwekubaĩkãwẽ. ²⁰Ha inũ, mã txakabuwaiwẽ taeshũ matũ shanẽ ibũ matu kupia yumaĩ sinatama mã pe beshmaski. Hakia Jesus ikũwaĩ mã pepaiwẽ taeshũ ha xinãma matũ shanẽ ibũ matu kupia yumaĩ hawa yuiama mã sinatamakẽ Deus matuwẽ xinã txãkãmiski. ²¹Eskawẽ taeshũ Deusũ matu katukĩ kenaniki. Mã hawa bika teneriamakẽ Cristo dukũ ha dukũtũ matu bika teneshuniki, ha txibãkĩ matũri mã bika teneriashanũbunã. ²²Xinãkãwẽ, Cristorã, matu eskashunikirã. Tsua betsa parãtaskama inũ hawara Deusũ nemani inũ yununi kanekĩ hawa txakabuwamahaira matu ishuniki. ²³Hanushũ Cristo itxabiabu hatu bebis kemanamei hãtxama iniki. Isĩ tenemabiabu hawẽ hatu dateti hãtxa kuxipa tashnimama iniki. Hamẽ haskama Deusũ hatu unãti wakĩ txanima kaneismatũ hau mekekubainũ hawẽ hiwea hawẽ Epa Deus inãkubainiki. ²⁴Cristo hamebi hawẽ yura cruzki dunua mawakinã, nukũ txakabu nuku bushuniki, nuku xinã betsa wamakĩ nũ ana txakabu husiyamashanũ nuku buashũkinã. Hanua hiwea bena nũ ma haya nũ ma pepai hiwekũkainaii. Cristo mawakĩ hau ana txakabũ matu tsumayamashanũ matu meshpamaniki, yura betsabũ hatũ isĩ teneai shushawakinã. ²⁵Ha dukũ na mai anu hiwearã, txashuwã ibuuma benuabu keska mã iki taenibuki. Hakia natiã Cristo ikũwãkĩ matũ hiwea txakabu henetã mã ma Cristo txibãyã hanua mekenika pepatũ ma matu mekeshũ uĩkiki.

Aĩyãbu inũ beneyabu haskai hiwetikiaki, na hãtxarã

3 ¹Aĩbu beneyabuũ, maturi yuinũ nĩkairakãwẽ. Matũ benẽ matu yunua nĩkatã habebis yununamei hẽ iyamama ashũkubaĩkãwẽ.

Haskakī hatiritū matū benē Deusū hātxa ikūwāriama duawai mā pepakūkainai matu uikubaĩmiswē taeshū hātshawēsma mā pepawamiswē matū bene bestibu Jesus mā ikūwāmatiruki, ²Deuski mesei pe hiwekī mā hatu uĩmakubainaiwē taeshunā. ³Haska inū, eska bestiwē bemakis hawērua bestitā hatu uĩmakatsis iki bushtiwē buesheketā usūtiniĩ usuakeakei ouro mane hawēruawē dauwa batxi karuhaira sawe bestitā hatu uĩmai mapuyamakubaĩkāwē. ⁴Hakia haskai bemakis bestima matū huĩti uke merā matū xinā duapa betsaisma haska matū yushī ha pepa hawērua duapai huĩti pepaya mā kūyā ismakenā, haskawē hawēruati Deusū abumisrā, keyuismaki. ⁵Habiaskariai ē shenipabu aĩbu pepabū Deus ikūwāki hatū mabu hawērua saweawē hawēruama hakia hatū benē hātxa nīkai hawēruapaunibukiaki. ⁶Eska wakī Sarā hawē bene Abraō shanē ibu wakī hawē hātxa nīkatā txibāpaunikiaki. Maturā, tsuara mā Sarā bai tanakatsis ikairā, hawē baba keskakinā, hawaki dateama pepa bestikī matū bene uĩmakubaĩkāwē.

⁷Ha dikabi mā huni aiyābuū, maturi yuinū nīkakāwē. Matū aĩ matube hiwea habebis nīkakanākubaĩkāwē. Hatū yura kuxipa beshmas mā unaiĩ. Haskabiakē Deusū habe matu hiwekuia ināshanai keska haska Deusū abuai keska matū aĩri hatu uĩmakī duawariakubaĩkāwē. Mā haskamiswē taeshū Deusbe hātšakī mā yukai matu nīkakubaĩshanikiki. Hamē haskama mā habe hiwetšakashū Deus yukairā, matu hawa nīkama ishanikiki.

Jesus ikūwā kayabi warā, bikabiakē tenekubaĩtikiaki, na hātšarā

⁸Haska tibi ē matuki txanishurā, haska bestiwē hiwekī Jesus ikūwaĩbu tibibube habias xināwātā hatuki dasia binunānāma pepai babu keskatā keāma abunamekubaĩkāwē. ⁹Ha inū, matu txakabuwabu hatubebis ana txakabuama inū matu itxabu hatubebis ana manakunaĩ itxakanāma ikubaĩkāwē. Hakia matu duawakatsi Deusū matu katuniwē taeshū matu itxakawabiaibū ha xināma pepakiri besti hatu yuikubaĩkāwē, hau Deusū hatu merabewakī duawariakubainunā. ¹⁰Haskakiri shanē ibu Davī hatu yuikī:

“Tsuabura na mai anu bari itxapa unānuma hiweyukatsi ikinā,
hatū keshawē hātšaxa txakabukī txani yuikatsi ikamarā,
hatū hana hau mekekubainūbūwē.

¹¹Hamapai txakabuki hari kemama haskai unānumakī
pe besti benakī haska txibākubaĩkāwē.

¹²Pepabu mekekubaĩkī hawara yukaibu merabewakatsi iki
Deus pashtishū hatu nīkamiski.

Hakia habū txakabuwaibu uĩ hatuki Deus sinatai hatukiri
petximiski”,
hatu watā keneniki.

¹³Hanushū mā hawa txakabuwama pe besti ikubainaibu haska watā tsuā matu hawawē taeshū txakabuwatirumaki. ¹⁴Hakia Jesus ikūwai haska pepawē dayai mā hiwebiakē matu itxakawabiabu mā nuitapabiaya Deusū matu duawakubainai xinaī huītinī benimakubaikāwē, e iki hatuwē hawa dakeamarā. ¹⁵Hamē Cristo matū Shanē Ibu ashūkinā, matū hiwea inākī kēwākubaikāwē. Matū hiwea mā ma pewakē tsuāra haska mā Cristokiri kakape ikūwai matu yukaibu mā hatukiri pe shabakabi txanikī mā hatu kematiruki, ¹⁶babutā keāma hatu pewē hātxa wakinā. Hawa matū hiweakiri xinaī mā bika teneamakē haska mā Cristo ikūwai xinā txakabuma matu unātā ha habū hātxa txakabuwē matu yuaī hātxa txakabumisbu ibubis hatū hātshawē daketirubuki.

¹⁷Hamē mā txakabuwaya matu kupiaibu matū txakabuwē taea tenekāwē. Hakia Jesus ikūwākī hawara pepa mā abiaya hawē taeshū matu itxakawaibu Deusū hatu nemama mā yumainā, txakabumaki. ¹⁸Hakia Cristo pepabia nū txakabuwē taea nukuwē nui nukū txakabu buanū ika bestiwai ana mawatimai nuku mawashuniki. Cristo hawa txakabuwamabia Deus yurabu mekemanū ika nukū txakabuwē nukuwē taea nuitapaniki. Hawē yura babu mawabiatā habias hawē yuraya ana mawatirumai hawē yushī besteni hiwekūkainikiki. ¹⁹Yushī itxapabu Deusū nitxīkī bitxini kini anu Jesusū yushī hari kashū hatu hātxa wakī haska Satanás maematā hawē hiweakiri hatu yusitanikiaki. ²⁰Hamē nukū shenipabu Noē hawē nunuti waya habias habu yushī patapanibu nitxīriama hau Deusū hātxa nīkanūbū hī hī, iwanā, hawaira hatu kupikatsi ikama Deusū hatu manayuaya hawē hātxa danānibukiaki. Ha inū, ui heneama hene ewa wakī yura betsa betsapabu hatū txakabuwē taeshū ha heneuwē hatu kupikī Deusū dasibi yamawanikiaki. Hanushū yura eskarabes oito besti nunuti merā Deusū hatu kupiama Noēwē besti pashai mekenibukiaki. ²¹Hanushū natiā Jesus mā ikūwāyā ha heneuwē Deusū hatu kupini mā xināyā habū matu naximakī matū yura detsis txukaisbumaki. Hakia nukū txakabu Deusū buatā nukū xinā hau nuku pewashūkubainū nuku imamisbuki. Hakia nukubu pashairā, Jesus Cristo besteni ha besti txibākubaini nū ishākanaii. ²²Hanua Jesus mawa ana besteā nai anu ka hawē Epa Deusū yusiuri tsauwa Deusū nai tsumabu inū shanē ibu kuxipa dasibibu Deusū Jesus yununi Jesus shanē ibukī dasibibu hatu mekekubainikiki.

4 ¹Na mai anua hawē yurawē Cristo nuitapai yumani keskai ha ini keskariakī matūri txibākubaikāwē, tsuāra hawē yurawē bika betsa betsapa txakabu tibi mebiai ha txakabu Cristō binuni mā maemariatirubukirā. ²Hatishū matū kemu na mai anushū henetā hatishūra matū hiweawē besti haska Deusū xinākī abuai matū hiweawē dayashuni hiweyukāwē. ³Hamē Deus mā ikūwāriama ha ikūwābuma keska mā iriapaunibuki. Hawara hakimatixara kemuti txibaīnā, ha inū,

kemui aĩbu tibibe menamei inũ, piti mirimawẽ kemutapai inũ, nawai beyusi paeĩ inũ, dami yushĩ kẽwaĩ mã txakabuhairai keyurianibuki. ⁴Hakia natiã ana ha haskaibube ana hatube ketashametã mã ana hatube betsa betsapai kemutapamakẽ mã hatube ikĩ hatu uĩmapauni habu matuki ẽ hẽ ikĩ matu yuãmisbuki. ⁵Natiã ha habu haska hiwekubaĩmisbu Deus bebunua haki txanishanaibu pewamissũ hanu bari hawẽ heneaitiã Deusũ hiweabu inũ mawabu hatu unãti watã hatu kupishanikiki. ⁶Hatu haska washanaiwẽ taea tsuabura hatu yurawẽ txakabui mawa keska hiwekĩ yurabũ hatukiri uĩ hãtxabiamiswẽ taeshũ Deusũ hatu unãti watã kupitirubia hatũ xinã betsa watã hatũ yura txakabubiakẽ yusĩnanãmisbũ Cristõ kakapekiri hatu yusiabu hatũ yura txakabubia xinã betsa watã hatũ yushĩ Deusbe hiwetirubu hatu yusiabu nĩkanibuki.

Jesus Cristo dayashuni merabenãtikiaki, na hãtxarã

⁷Hanua na mai keyui ma kemaya ana tatimama matũ xinãnẽ pe mekei unãnepai txanima kayabi Deusbe hãtxai heneyamakubaĩkãwẽ. ⁸Matu dasibirã, eska besti ikubaĩkãwẽ. Hawara mã hatubetã kanemis mã nui itxapa hayarã, hawẽri matũ txakabu mã buatiruwẽ taea nuinamei inũ abunama kayabikubaĩkãwẽ. ⁹Tsuara nia matũ hiwe anu mapekeaibu hatuki dakekenaĩ hãtxa txakabuwama hatube beyanamekubaĩkãwẽ. ¹⁰Haska Deusũ matu kuxipa inãkĩ duawamis hawẽ dayakĩ pewakubaĩkãwẽ, hawẽ duapa kuxipa tibi ma matu inãni mã hayawẽ taeshũ betsabu uĩmai merabenaĩnã. ¹¹Haska inũ, tsuãra yusĩkatsis ikinã, Deusũ matu yusĩmis keska besti hau hatu yusĩkubainũbũwẽ, ibubis hatũ hãtxawẽ akamarã. Ha inũ, tsuãra yura betsabu merabewakatsis ikĩ haska Deusũ matu kuxipa inãmis hatu uĩmakĩ hau hatu merabewakubainũbũwẽ. Hawara betsa betsapawẽ merabenãkĩ mã akubainairã, hawẽ Deus hatu kẽwãmakubaĩkãwẽ, Jesus Cristowẽ taeshunã. Mã hatu haska wakubainairã, Jesus Cristo shanẽ ibumis dasibi kuxipa pepa hawenaki, ikibi ini hawẽ kuxipa paepa heneismarã. Haskakirã.

Nũ Cristo ikũwaĩ nuku itxakawabu benimatikiaki, na hãtxarã

¹²Ë betsabu inũ ẽ puibuũ, matuwẽ nuikĩ matu yuinũ nĩkakãwẽ. Dasibi ikũwaĩbunã, bika betsa tibi nũ tenekubaĩmisbuki. Ma maturi memairã, ha bikawenã, hawẽ e iki hawẽ nuiama mestõtã tenekubaĩkãwẽ. ¹³Haska matu memabiabu Cristo ani keska wakĩ habiaskarianiwẽ taeshũ matu tenemariakanikiki. Haskawẽ taea Cristo shanẽ ibuhairai ana tashnikirã matu benimahairawashanai xinaĩ natiã haskawẽ benimatimabiakẽ Cristowẽ taea benimayukubaĩkãwẽ. ¹⁴Ha inũ, mã Cristokiri yusĩkubainaibuwẽ taeshũ haska abuama tsuabura matuki sinatai ha ikaibuwẽ taea mã ma Deusũ pepa haya hawẽ benimakubaĩkãwẽ, Deusũ

Yushī Papatū matu merāshū matu henebainama hawē kuxipa matu uīmakubainikikirā. ¹⁵Matū yura betsa nuitapairā, eskawē taea imisbuki, pubēburā, yumetsuburā, itxakanikaburā, yura betsa bika waiwē taeshū hatu yumāwāmisbuki. Hamē matu ikirā, mā hatu keska hiweamabia matu yumāwāiburā, haska peki. ¹⁶Haskawē taea mā shabakabi Cristo txibaibu matu nuitapa wabiaibu hatuwē datei dakeama mā Cristonabuwē taea hawē Deus kēwākubaikāwē.

¹⁷Jesus Cristo ikūwai nū hawenabuwē taeshū natiā bika betsa tibi memakī nuku tenemakubaikanikiki. Haska nū tenebiamiskē Jesus ana huaya habū Deusū kakape danāmisburā, habu Deusū kupiarā, haskarara Deusū hatu kupiaitiā yumākī tenetxakayamashākanimēkaī? ¹⁸Nū Deusunabu bika betsa betsapa tenebiai pashai Jesusbe hiwenū ika nū manaibū habū txakabuwakī Deusū hātxa danākī nīkaisbuma hatū txakabuwē Deusū hatu kupiaitiā haskarara bika hatu tenematxakayamashanikiki. ¹⁹Hanushū Deusū yunua hawē xinānē tsuabūra aki bika teneaiiburā, haskaibu peki. Hanushū hawara pepa akinā, hau heneyamakubainūbūwē. Hau matu mekekubainū matū hiwea Deus inākubaikāwē. Hatū nuku damiwanishū nuku heneisma ikūkaikī nuku uīmashanikiki.

Mekenikabu hatu yusīnikiaki, na hātstarā

5 ¹Nukū Shanē Ibu Cristo nuku yumāshunai ē uīniwē taeshū natiā habuā mae tibi anushū Cristo ikūwaiibu matu mekenikabu ē matu hatu yusī pewakatsis ikai ea nīkakāwē. Eari Cristo ikūwaiibu ē hatū mekenāriki, habu keskarirā. Ha inū, Cristo shanē ibuhairai hukī hawē kuxipa nuku uīmaya eari ē hatube benimatxakayamashanaii. ²Deusū enabu txashuwā keska matube hiweabu Deusū matu yununi hatu mekeirakubaikāwē, mā haska pe xinākī hatu merabewakatsi ikairā, haska Deusū abuai keska wakinā. Hatu yunu bestiama inū pei binū ika kemuama hakia xinā tibi wama pe bestiawē nuikī hatu pe mekekī ashūkubaikāwē. ³Ha inū, maturā, habu matube itxamisburā, mā hatū ibumaki. Haskawē taeshū matū hiwea pepa hatu uīma bestikī txibāmakubaikāwē, hatube merabenākinā. ⁴Hanua mekenika kayabi Shanē Ibu Cristo hushū mā hamapai binumisbu kupiti pepawē matu manakukī maiti hawērua keska txaputima matu ināshanikiki, Cristobe matu txashakapawakinā.

Ikūwaiibu txītūtimakiri yusīnikiaki, na hātstarā

⁵Habiaskariakī habuā mā hatu txibaibuū, mekenikabū matu yusīkī yunumis nīkatā hatū hātxa txibākubaikāwē. Dasibi mā habū ikūwaiiburā, babutā keāma nīkakanākubaikāwē, eskawē taearā. Deusū hātxa yuishunikatū kenekī:

“Tsuabūra yuikī:

‘Hamapai betsa betsapa emebi ē atiruki’, ikī keaīburā,
Deusū hatu beshtemiski.

Hamē tsuabura babutā yuikī:

‘Deusū besti ea merabewaya

hawara txakabu hawē pepawē besti ē daībaītiruki’,
ikaibu duawakī habu merabewakubaīmiski”,

iniki. ⁶Txanima Deusū kuxipawenā, matu ashūturu hayawē taea babutā keāma manakakubaīkāwē. Hanu akaitiā Deusū matu duawakī shanē ibu wakī kēwāshanikiki. ⁷Ha inū, hawara tibiwē mā bika tenei teai niti imis tibi Deus inākubaīkāwē, hatū matukiri xinaīkikirā.

⁸Inu keneya pītsikī yuinaka atxitā pinū ika benabauni pubeī hāsh hāsh iki tekerē tekerē imis keskakī diabo Satanāsā matu beparātā matu maemanū ishū benakubaūriaikiki. Haskawē taea ibubis pe mekekī hamapai txakabu ana meama hanū bestētā uīrakubaīkāwē. ⁹Mā ikūwai mestētā Satanāsā kemuti ana meama henei hē iyamakubaīkāwē, na haska tibi mā meairā, matubetā ikūwaiūbu mai hirabi anuari habias keskari teneriaību xinaīrakubaīkāwē. ¹⁰Ha dukunā, bari itxapama mā nuitapayuai. Deusū haska matu memabiatā habiatūri matu kuxipa wakī pashkatima watā ha hawē mestēwātiwē matu pepa wakī keyushanikiki. Jesus Cristobe nū haki dasitā hiwea ikibi iki nū pepai kuxipashanūbū habias Deus nuikīpatū hawena wakatsi ikī nuku katuniki. ¹¹Ha nukū Deus shanē ibu kuxipahairarā, hau habiaskas ikūkaīnūwē, niti ikamarā. Haskakirā.

Pedro hatuwē nuinikiaki, na hātcharā

¹²Nukū betsa Silvano txītuīisma ē yunua na ē hātcha eskarabes matu keneshūshu ē matu anu bumai nīkakī uīshākāwē. Na haska Cristo ikūwākī hawē matu nuimai mā ikairā, txanima Deus matuwē nuikī hawē pepa matu uīmaikiki. Haskakē hawa txītuī niti ikama mā ikubainūbū matu merabewakī keneshūkī ē matu yusīshu inū ē matu mestēwāshu hawē taeshū Deusū pepa bikubaīkāwē, ha nui pae mā hayawē taearā.

¹³Roma anushū ikūwaiūbu Deusū habu matube katuni inū Marcos ē bake keskatū hatū hātcha matu yunuriakanikiki.

¹⁴Haska inū, Cristo txibaību tibi hatuki nukutā hatu danāma hatube abunamekubaīkāwē.

Cristo ikūwai mā hawenaburā, hau Deusū unānuma matu hiwemakubainūwē.

Hatiski, ē hātcharā.

Pedro